




ՀՈԳԵՎՈՐ ԾԵՄԱՐԱՆԻ ՈՒՍՈՒՄՆԱԿԱՆ ՏԱՐԵՇՐՋԱՆԻ ԲԱՑՈՒՄԸ

Սույն թվականի սեպտեմբերի 10-ին, շաբաթ օրը, առավոտյան ժամը 11-ին, հոգևոր ձեմարանի հանդիսությունների դահլիճում տեղի է ունենում ձեմարանի 1983—1984 ուսումնական տարեշրջանի բացման հանդիսությունը՝ նախագահությամբ Վեհափառ Հայրապետի:

Հանդիսությանը ներկա էին Մայր Աթոռի ատենապետ Ս. Սիոն արքեպ. Մանուկյանը, Մայր տաճարի լուսարարապետ Ս. Հուսիկ արքեպ. Սանթրոյանը, Մայր Աթոռի դիվանապետ Ս. Ներսես եպս. Պոպապայանը, ուխտավորաբար Մայր Աթոռում գտնվող Հունաստանի հայոց թեմի հայրապետական պատվիրակ և Դամասկոսի հայոց թեմի առաջնորդ Ս. Ոսկան եպս. Գալփաթյանը, Մայր Աթոռի միաբանությունը, հոգևոր ձեմարանի տեսչությունն ու դասախոսական կազմը, ուսանողությունը, մայրավանքի պաշտոնեությունը և այլ հյուրեր:

Հանդիսությանը ներկա էր նաև Հայկական ՍՍՀ Մինիստրների խորհրդին առընթեր Հայ Եկեղեցու գործերի խորհրդի նախագահի տեղակալ Անդրանիկ Հասրաթյանը:

Հանդիսությունը սկսվում է Հայաստանի պետական հիմնի երաժշտությամբ, որից հետո ներկաները խմբովին արտասանում են «Տերունական աղոթքը»: Այնուհետև հոգևոր ձեմարանի սաները մեծ ոգևորությամբ կատարում են «ձեմարանի քայլերգը»:

Բացվում են հանդիսությունների դահլիճի դռները, և բուրվառակրի ու մոմակիրների ողնեկցությամբ, Ավետարանը ձեռքին, դեպի նախագահության սեղանն է շարժվում ձեմարանի փոխտեսուչ Ս. Հայկապուն վրդ. Նաջարյանը և ընթերցում «Սերմնացանի առակը» (Մատթ. ԺԳ 4—9) հատվածը:

Ավետարանի ընթերցումից հետո, ձեմարանի հոգևոր երաժշտության դասախոս Հայկ Ֆրունջյանի գլխավորությամբ, ձեմարանի սաները կատարում են «Որք վարդարեցին» և «Աջակերտք Քրիստոսի» շարական-երգերը: Ապա Գ լսարանի ուսանող Մեսրոպ սրկ. Խաչիկյանը արտասանում է Նարեկացու «Աղերս առ Սուրբ Հոգին» (Բան ԼԴ) հատվածը:

Ուսումնական տարվա վերաբացման առթիվ հոգևոր ձեմարանի տեսուչ Ս. Եփնիկ քին. Պետրոսյանը հանդես է գալիս հետևյալ խոսքով:

«Այսօր Մայր Աթոռ Սուրբ Էջմիածնի հոգեվոր ձեմարանը կրկին բացում է իր դռները: Այսօրվում է նոր ուսումնական տարին: Այս սրբազան կամարների տակ այսպես սկսվել և ավարտվել են բազմաթիվ ուսումնական տարիներ, որոնց ընթացքում հոգևոր ձեմարանը կատարել է իր հիմնական գործը, այն է. պատրաստել ձեռնհաս և վարճացած հոգևորականներ Հայ Եկեղեցու և հայ ժողովրդի համար:

Այսօր այս դահլիճում նստած հոգևորականների մեծ մասը հոգևոր ձեմարանի ջրօնավարտներ են:

Մեր հարգարժան հոգևորականների կողքին այսօր նստած են նաև երիտասարդ, մատաղ հոգիներ, որոնք հոգևոր ձեմարանի այսօրվա ուսանողությունն են: Նրանք մտել են այս կամարների տակ, այս կամարների տակ մնալու, այս կամարների տակ ապրող հայ կրոնական և մշակութային ոգու մասնիկը դառնալու համար:

Հոգևոր ձեմարանը այս ուսումնական տարին սկսում է 47 ուսանողներով՝ բաժանված երեք լսարանների և երկու դասարանների:

Հոգևոր ձեմարանի դասախոսական կազմը այս տարի համալրվել է երկու նոր ուժերով: Անգլիայի Օքսֆորդի համալսարանի աստվածաբանական ֆակուլտետում իր բարձրագույն կրթությունը ստանալուց հետո Մայր Աթոռ և հոգևոր ձեմարան վերադարձավ Տ. Հովնան աբեղա Տերտերյանը:

Այս տարի հոգևոր ձեմարանում դասախոսական աշխատանքի է հրավիրվել նաև բանասիրական գիտությունների թեկնածու Լևոն Տեր-Պետրոսյանը:

Հոգևոր ձեմարանի տեսչության կրպակը հետևային է.

Տեսուչ. — Եզնիկ քահանա Պետրոսյան:

Փոխտեսուչ. — Հայկապետ վարդապետ Նաջարյան:

Վերակացուներ. — Կառլեն սրկ. Պետրոսյան, Վաչագան Հովհաննիսյան և Լևոն Պետրոսյան:

Քարտուղար. — Գարուշ սրկ. Լազարյան: Գրադարանավար. — Հենրիկ Բալյան:

Նոր՝ 1983—84 ուսումնական տարին ըսկըսվում է Ամենայն Հայոց Վեհափառ Հայրապետի ծննդյան 75-ամյակի և Սրբալույս Մյուռոնի օրհնության տոնակատարությունների նախօրյակին: Այդ նոր թափ, նոր եռանդ է հաղորդում մեր աշխատանքներին:

Վեհափառ Տեր, հոգևոր ձեմարանի տեսչությունը, դասախոսական կազմը և ուսանողները հավաստիացնում են Չերդ Սրբությանը, որ այս տարի նույնպես սրբությամբ և պարտաճանաչությամբ հոգևոր ձեմարանը կապրի ուսումնական-դաստիարակչական կյանքով:

Այս առթիվ խնդրում ենք Չերդ Սրբության օրհնությունը հոգևոր ձեմարանին:

Օրհնեցեք մեզ, Վեհափառ Տեր»:

Այնուհետև իր օրհնությամբ և բարի մաղթանքներով խոսում է Վեհափառ Հայրապետը:

ՎԵՀԱՓԱՐՈՒ ՀԱՅՐԱՊԵՏԻ ԽՈՍՔԸ՝ ԱՐՏԱՍԱՆՎԱԾ ՀՈԳԵՎՈՐ ՁԵՄԱՐԱՆԻ ՎԵՐԱԲԱՑՄԱՆ ԱՌԹՎ

Աստուծո ողորմությամբ մի անգամ ևս Մայր Աթոռիս հոգևոր ձեմարանը իր դռները բաց է անում, և այսպիսով սկսվում է նոր ուսումնական տարեշրջանը՝ 1983—1984:

Ես եղջանիկ եմ, անշուշտ, որ այս անգամ ևս ներկա եմ գտնվում այստեղ, ներկա եմ գտնվում այս կյարձ, բայց հուպիչ արարողության, հանդիպում եմ կրկին ձեզ բոլորիդ՝ հատկապես մեր հարգելի դասախոսներին և մեր սիրելի սաներին, որոնք այս տարի ավելի մեծ թվով են ներկայանում, որը, անշուշտ, առավել ոգևորություն է պատճառում մեզ:

Վստահ եմ, թե ինչպես նախորդ տարիներին, այս տարի ևս և՛ տեսչությունը, և՛ դասախոսական կազմը, և՛ մյուս պաշտոնյաները նոր թափով, նոր ոգևորությամբ պիտի վերսկսեն իրենց աշխատանքները, իսկ դուք, սիրելի սաներ, վստահ եմ, որ նույն լուրջ գիտակցությամբ պիտի տանեք ձեր աշխատանքները և տարվա ընթացքում ջանասեր պիտի լինեք, չպիտի տկարանաք, ծուլանաք ձեր ուսումնական գործունեության ընթացքում, պիտի աշխատեք հնարավոր չափով առավել գիտելիքներ ընդունել և ամբարել

այն բոլոր բնագավառներից, որոնք դասավանդվում են ձեզ: Մասնավոր կփափագիմ ես, որ մասնավոր ուշադրություն դարձնեք նաև եկեղեցական արարողություններին, ժամերգություններին կանոնավոր հաճախեք, և ոչ միայն պարզապես ներկա լինեք եկեղեցական արարողությանը, այլ գործնական մասնակցեք և այս ձևով ձեռք բերեք ուսակություն, վարժություն և գիտություն նաև այդ կարևոր ասպարեզում, որովհետև հոգևորականից, գուցե առաջին հերթին, պահանջվում է լավ ծիսակատար լինել և տեղյակ եկեղեցական արարողություններին: Այս բոլորի վրա պետք է ավելացնեմ նաև, ինչպես նախորդ տարիներին ես չէի մոռանում ընդգծել, որ մեր ուշադրությունը, բոլորիս ուշադրությունը՝ ինձանից սկսյալ, հոգևոր ձեմարանի տեսչությունից, դասախոսներից և մեր Մայր Աթոռի միաբաններից սկսյալ, բոլորիս ուշադրությունը ձեր վրա պիտի կենտրոնանա նաև, ձեր կարգապահ կյանքի առնչությամբ, ձեր կեցվածքի, ձեր խոսվածքի, պարկեշտության և վարելության տեսակետից: Մի խոսքով այն, ինչ մենք հասկանում ենք բարոյական կարգապահություն

ասելով: Այդ հարցերի մասին մենք միշտ պահանջկոտ պետք է լինենք և պետք է սպասենք ձեզանից՝ սիրելի սաներ, որ դուք, խսկապես, կարգապահ լինեք ձեր մտածումներում, ձեր զգացումների մեջ, ձեր վարք ու բարքի մեջ: Սա շատ կարևոր հանգամանք է, առանց դրանց մեր հոգևոր ճեմարանում չենք կարող պահել ուսանողներ: Եվ անցյալում էլ, անշուշտ, պատահել են, որ երբ մենք բալում ապոարարություններից կամ հորդորներից հետո, երբ տեսել ենք, որ այս կամ այն ուսանողը այդ բարոյական նկարագիրը չի կարողանում պահպանել, մենք նրանց հրավիրում ենք դուրս գալ ճեմարանից: Այս, ես կրկնում եմ կարևորությամբ, և վստահ եղեք, որ մեր ուշադրությունից երբեք չպիտի վրիպի այս պարագան:

Ես, մասնավոր կերպով, ուզում եմ ողջունել այստեղ դասախոսական կազմը, մանավանդ, ուրախությամբ լսեցի տեսչի զեկուցումից, որ դասախոսական կազմի մեջ ավելացան նաև նոր դասախոսներ, և վստահ եմ, որ նրանք նախկինների հետ միասին՝ ձեռք-ձեռքի տված իրենց պարտականությունները լիակատար կերպով պետք է կատարեն:

Մեր հոգևոր ճեմարանը իմ գնահատականով, կարելի է ասել, որ քայլ առ քայլ հառաջադիմում է, տակավին, գուցե, չի հասած այն բարձունքին, որին մենք տեսնում ենք: Դա դժվար գործ է, երկարատև աշխատանքի ու փորձի և դասախոսական կազմի հետ կապված: Եվ այդ բոլորը, սակայն, ինչպես ասացի, հետզհետե իրագործվում է, և ես վստահ եմ, որ այս ճանապարհով առաջիկա տարիների ընթացքին մենք իրոք պիտի կարողանանք ավելի և ավելի բարձր մակարդակի վրա դնել մեր հոգևոր ճեմարանն ուսումնական և բարոյական, ինչպես նաև հոգևոր դաստիարակչական տեսակետից: Բարեբախտաբար, մենք բոլոր տվյալները ունենք, մեր նյութական պայմանները բավական ձեռնտու են, որպեսզի որևէ խնայողություն չկատարենք այդ տեսակետից: Եվ նաև երջանիկ ենք, որ մեր երկրում բարենպաստ պայմանների մեջ ենք գործում թե՛ իբրև Եկեղեցի և թե՛ իբրև կրոնական տարբեր հաստատություններ: Այստեղ ներկա է մեր պետական իշխանության ներկայացուցիչը, և այս առիթով, ես ուզում եմ իմ երախտագիտությունը հայտնել մեր հայրենանվեր պետությանը, որ միշտ իր բարի վերաբերմունքով նպաստում է Մայր Աթոռի աշխատանքների հառաջդիմության ու նաև մեր հոգևոր ճեմարանի բարգավաճման:

Ահա, այս պայմանների մեջ սկսում ենք մեր նոր տարեշրջանը և ես հայցում եմ բոլորիդ համար Աստուծո օրհնությունը, օգնականությունը և մաղթում եմ ձեզ լիակատար, նորանոր հաջողություններ:

Սիրելի դասախոսներ, և դուք սիրելի ուսանողներ, օգնեցեք մեզ, հոգևոր ճեմարանին, որպեսզի մեր այս ազնիվ և բարի նպատակները հետզհետե իրագործվեն Աստուծո ողորմությամբ:

Թող Տերը ծաղկյալ պահի Մայր Աթոռ Ս. Էջմիածինը և հոգևոր ճեմարանը, այժմ և միշտ, ամեն:

*
* *

Հոգևոր ճեմարանի բացման սույն հանդիսությունը ավարտվեց խմբովին երգված «Հայր մեր»-ով և Նորին Սրբության «Պահպանիչ»-ով:

